

26/05/1998

Artis disaran guna barangan tempatan

Azian Adnan

SEBAGAI golongan yang berpengaruh dalam masyarakat, semua artis disarankan menggunakan barangan buatan Malaysia seperti pakaian dan penampilan diri, terutama ketika membuat persembahan.

Langkah ini boleh membantu kerajaan dalam kempen menggalakkan barangan buatan Malaysia bagi mengelakkan pengaliran keluar ringgit Malaysia ke pasaran antarabangsa.

Presiden Persatuan Penyanyi, Pemuzik dan Penulis Lagu Tanah Air (Papita), A Rahman Hassan, berkata usaha ini haruslah dimulakan dari golongan berpengaruh seperti artis yang sering menjadi ikutan masyarakat, terutama remaja.

"Penampilan terutamanya cara mereka berpakaian sering menjadi ikutan remaja. Jika seseorang artis memakai pakaian berjenama terkenal dari luar negara, seseorang peminat itu boleh menghabiskan wangnya membeli pakaian itu.

"Justeru itu, adalah wajar bagi seseorang artis itu menggunakan pakaian berjenama Malaysia bagi menggalakkan peminatnya melakukan perkara yang sama seperti mereka.

"Saya percaya tindakan ini tidak merugikan, malah menguntungkan semua pihak tidak kira artis ataupun peminatnya sendiri," katanya ketika ditemui di sidang akhbar Ekspo Papita '98 anjuran Papita dan Majlis Perbandaran Subang Jaya (MPSJ) di Subang Jaya, semalam.

Turut hadir Yang Dipertua, MPSJ, Ahmad Fuad Ismail dan exco Papita.

Ekspo itu yang akan diadakan di Subang Jaya, mulai 5 hingga 25 Julai ini, dijadualkan perasmiaannya oleh Perdana Menteri, Datuk Seri Dr Mahathir Mohamad pada 7 Julai, jam 4 petang. Penaungnya ialah Menteri Perdagangan Dalam Negeri dan Hal Ehwal Pengguna, Datuk Seri Megat Junid Megat Ayob.

Rahman berkata golongan artis seharusnya menyedari kepentingan menggunakan barangan buatan Malaysia ketika negara sedang mengalami kegawatan ekonomi yang turut menjejaskan pendapatan mereka.

"Anggaplah ini sebagai satu sumbangan dan keprihatinan artis terhadap masalah yang dihadapi kerajaan tatkala ini.

"Saya amat yakin barangan buatan Malaysia setanding, malah lebih baik daripada barangan jenama dari luar negara," katanya.

Mengenai ekspo itu, Rahman berkata pihaknya berharap orang ramai memberi sambutan, terutama dalam menggalakkan pembelian barangan buatan Malaysia.

"Pada ekspo itu, kesemua barangan yang akan dipamerkan adalah produk buatan Malaysia bukannya barangan luar negara.

"Ini adalah bersesuaian dengan tema ekspo itu iaitu 'Selamatkan Ringgit Malaysia'," katanya. Ekspo itu bermula pada jam 4 petang hingga 12 malam setiap hari, tidak termasuk hari Sabtu dan Ahad yang bermula lebih awal.

"Pada setiap malam, ekspo itu turut menampilkan mini konsert oleh penyanyi tanah air, di samping mempromosi barangan buatan Malaysia kepada semua pengunjung," kata A Rahman.

(END)